



石泉書屋尺牘

石泉書屋尺牘

14
743
8





同治辛未年鐫

石泉書屋尺牘

利津李氏葺板



題辭

書問酬答自寫性靈而金石之考證友朋之規益皆隨在流露
足與蘇黃並駕矣

侍宋晉讀

尋常酬答無意為文而憂世之懷樂天之致時形之意言之間
斯德人之雅音非一日百函者可同語也

侍馮譽驥注

石泉書屋尺牘 是齋

石泉書屋尺牘卷上

賀蘇蕉隣表兄及第

利津 李佐賢 竹朋

仲夏得聞及第佳音欽佩無似閣下以雋雅之才應清華之選
本意中事所可羨者臚傳三唱名冠仙曹且兼家學相承淵源
繼美方今惟蔣笙陔前輩橋梓堪並傳為士林佳話所謂邦家
光非閭里榮也從此著作承明主持文教大展平昔之抱負樂
可知已秋間想當請假榮旋遠遊之說是否尙須變計竊意明
歲考差伊邇不若優游芸館以待星軺出使較為良策未知尊

意以爲何如

謝周穉圭中丞世丈

日前趣謁幸遂瞻依乃荷情殷念舊旣謙光之下逮更隆貺之
特頒感銘曷極恭惟老世伯大人勲業冠時經綸名世卽今澤
流湘楚布化南邦更卜位躋鈞衡承
恩北闕遙企五雲莫名欽頌姪解纜東下布帆迅速幸越蔭之
遠依長途粗適况麥舟之厚誼寸衷鐫銘雖關山迢遞漸遠卿
月之輝而寤寐馳依常繞春風之座

致劉眉生方伯世丈

前月樞侍崇階得親光霽仰承殷勤俯接畧分言情拂拭體恤
無微不至拜違以來銘感之念與依戀之私時縈左右也頃者
尊使到舍接奉鈞翰敬悉壹是恭惟老世伯大人景福

天申繁禧日懋膏澤旁敷萬戶羣祝生佛仁風普被十郡共躋
春臺允宜

寵眷之日隆更覩純嘏之並茂卿雲企望曷勝祝忱德州書院
旣無需到館自當恪遵鈞命至今歲脩金原祈春風嘯被慨賜
鼎言何期厚貺特頒轉分清俸緣長者之賜未敢言辭而祇頌
之餘真所謂鼇戴三山深知其重者矣

上座師帥子文夫子

客冬閱邸抄敬悉榮選之後仍復留都竊念宦海升沈何異塞翁得失况夫子大人廉隅勵節挽流俗之波靡道德持躬具古人之風義行邀

特達之知貯荷

簡畀之命小屈大伸祈勿以目前爲介介也佐賢奉諱家居無堪上陳立暮雪於師門夙荷培植緬春風於鈞座倍切馳依

致張勸庵同年

別久矣思君如流水無有窮已時每吟此句能不銷魂前歲曾

佈一函託杜筠巢同年轉爲奉上當邀霽照以後萍蹤飄泊音敬久疎亦總未接奉手翰想同心之契味本如蘭而君子之交淡原似水固不以音問爲疎密也客夏星輶過發興誠滇南欽交衡之執掌知

聖眷之優崇天末故人與有榮幸而未免有憾者當閣下南行之日正鄙人北上之時似我輩良朋聚首造物每靳惜之故使彼此相左不得握手談心以暢積愆耶是未可知也客冬想使節榮旋

天顏晝接從此冰銜迭晉更卜玉尺頻操至於勝跡遨遊詩帶

不身言思凡牌卷三
雲霞之氣奇才羅取門成桃李之陰名士風流才人福分兼而
有之則又同譜所共羨者也弟客秋自都旋舍讀禮跼伏冬初
襄理先人窀穸之事茲將行述敬呈青覽竊念連年重罹大故
永隔先靈蓼蓼者莪匪莪伊蒿此恨詎有終耶今歲需就館爲
餽口計劉眉生世丈爲薦一講席脩脯甚廉然可無須到館稽
康性懶亦屬相宜落得效兒時逃學故智閣下聞之得無失笑
否茲因家子芬兄公車之便專此佈臆紙短情長不覺其言之
絮也

致謝彭春農前輩

前歲脩後進之禮瞻大賢之儀乃蒙訓誨之殷拳更獲拂拭之
周至五中銘篆刻弗能忘恭惟大前輩大人福履康和視躬清
泰擁芸籤之富何殊福地琅嬛萃蓬觀之英盡屬公門桃李下
塵翹首上頌殷心晚奉諱家居幸眉生世丈青垂格外覲食有
資飲水思源實賴噓植譬諸小草曾沾化雨之施自愧菲材上
邀春風之惠翹首望雲旣感恩於此日傾心立雪待請業於他
年

復蘇蕉隣表兄

客夏賦別都門旋聞閣下得差喜信知星輅早已出都道里間

阻遂致箋賀久稽冬間接讀手書如獲面晤即稔老表兄大人
文旆榮旋從此篤眷

楓宸榮留芸館搏扶搖而上者不知其幾萬里也吾鄉戚友莫
不嘖嘖稱贊弟獨更有陳者念兄屢躋秋闈曾幾何時儼然為
人座主當此得意之秋試作回想得毋訝然失笑耶所取闈墨
理法兼到誠屬正法眼藏弟不第為閣下得士賀轉羨西安士
子遇此試官正不知幾生修到也弟客秋旋里今歲就滕縣彭
明府課讀之席定於仲春上館仍須執毛錐作制義生活殊非
所願威縣館局已接周芝舫觀察來信承吾兄推讓之誼殊深

鮑叔知我之感耳

復陳敘齋前輩

奉到鈞覆渥荷青垂意重詞溫流溢楮墨盟薇莊誦感銘五中
課卷仰荷批示蒙獎藉之逾分實慚悚之交并伏思大君子樂
育後進發於至誠豈為過情之期許而顧善善從長委曲詳盡
殆亦誨人不倦之深思即獎勸以為鼓勵耶所謂誘之而至於
道者非耶自愧菲材謬膺知遇何敢自外陶成惟有益加策勵
而已

致孫小平同年

夏間曾接還雲備綉綺注邇來音敬罕通知我者當不責其疎
懶也邇惟小平老父台同年大兄大人雅化弦歌薰陶我里雖
羈旅遠方者亦與故鄉父老同上神明之頌也惟聞海權依舊
未開雖廉節清操自當付之度外然栽花有地飼鶴無資殊令
人代爲眉皺耳弟寄硯膝暑忽易春秋駒光虛擲善狀毫無明
歲加科散館期近秋後必須北上而旅費尙無所出憶兒時作
枯窘題文以爲天下事無難於此今乃知謀生之難有過之無
不及也閣下聞之當爲粲然

復孟雨山同年

信宿尊齋備承雅誼素重芝蘭之契兼訂金石之交近復兩接
華翰秘閣珍藏絡繹見贈陳之几案古香流溢益感雲情不盡
然貪饗性在轉有無厭之求 亞聖廟碑自元以上擇其佳者
仍祈命工搨出見惠閣下得勿笑其年少不廉否大佛嶺石刻
搨價約需若干鐵山下題名祈一並代爲問明示知是禱石牆
邨石釋文奉趙細審所釋尙未盡確其五行行末明係篆書行
字此釋作采字斜書恐誤前在府看菊頗嫌其少故願借花以
獻今寄下花目佳種已備無需增益今呈三種其二係花目所
無蘭亭恐名同實異故仍奉上也

致范仲敏兄

別來已年餘矣思君之心如流水之無已時久欲作書緣不願以寒暄了事而萬斛離愁又不知何從說起故筆欲下而仍停者屢然疎懶之愆究何以自遣耶聞春間騶從赴陝想子孟夏可到邇來履祉安和定慰遠頌近中可得攝篆否念念吾兄廉潔清操銘諸夙夜慈祥之念發於真誠從此經濟展布想見仙臆所莅頓起神君之頌矣然弟竊有陳者我輩舉生平之抱負出而用世不難於得民轉難於獲上不難於飭躬轉難於接物事○事○獨○為○君○子○必○為○流○俗○所○忌○所○以○純○儉○從○眾○雖○聖○人○亦○有○委○曲

調○停○之○意○不○拂○人○以○徇○己○不○泥○古○以○戾○今○尤○貴○高○明○者○變○通○以○盡○利○耳

復焦笠泉同年

三秋話別倏屆杪冬正欲修函奉賀乃承華翰先頌捧讀回環如聆珠玉就稔笠泉前輩年大人玉尺量才全鍼造士輜軒所過頌聲定起三晉間矣侍逐隊軟紅如恆碌碌至卉木金石書畫之好結習所在興復不淺惟殘冬急景俗務蝟集牽蘿補屋殊費周章不啻催租人阻重陽清興耳誠甫筠巢條岑諸君仍不時晤對每於燈前月下小坐清談未嘗不同深懷想譬之瑤

不。是。言。生。人。財。一。卷。一。
鳥蓬山羣僊時聚純陽子獨遠遊不返益令人悵望暮雲天際也。

致徐桓生前輩

客臘曾具蕪函想登記閣邇來塵緣碌碌音敬久疎每憶光霽時深洄溯恭惟桓生老前輩大人道履吉祥福躬安燕全河著保障之勲萬井有安恬之樂風前引領無任頌忱秋間榮登薦牘仍復子虛深爲抱憾然念大君子道義自持宦途遲速諒不關懷况以蒼生屬望之切佇邀

聖主特達之知更不在目前之得失也晚芸署學趨樗材自愧

每憶訓誨請詳刻弗敢忘惟有守分安貧兢兢自勵不敢作違心之事不敢交損我之人期無負期望栽培之至意斯則所以報知己者耳

致劉燕庭觀察

聚首都門時聆教益雅合芝蘭之契遂訂金石之交自送旌麾曷勝悵惘心輪寤轂猶時左右追隨也恭惟燕庭先生大人謳頌隨車福祺載路煥新猷於榆塞荷
寵眷於

楓宸翹首聲華殷心頌禱長安獲古想搜羅益富譬之伯樂一

石身書屋凡牌卷上
過駿馬空羣快何如之羨何如之都市近鮮古泉數月來未獲
異品惟得一蒲坂幣尙屬精好謹將搗墨呈覽前承允賜卽墨
刀及共字幣尙未領到便中敢祈擲下以慰渴慕又憶太和五
銖直百各泉尊藏頗多倘肯分惠數枚更佳閣下幸毋笑其無
厭之求也尊處所缺各品亦望開示倘都門物色有獲當寄呈
以作李郭也

復吳子苾同年

春初接奉萬安舟次賜復手翰知兩次箋候俱邀青照捧讀再
四恍如得坐春風細聆塵教然引領懷思益觸我離愁萬斛矣

貴治爲入粵扼要之區自去歲軍書旁午事繁任重獨著賢勞
定邀

簡在超擢在卽當不讓崑臣專美於前也弟近况平順因明歲
考期在邇時習寫作而酬應之煩旣不能減金石之好且日見
其增益令人刻無暇晷前寄拓本內方板中作古泉形者乃燕
庭所藏其字良金四朱此品燕庭有二枚又有一品具體而微
日良金一朱中間穿孔皆不透前人譜中所無然金以銖計其
爲泉幣無疑其花紋似雲龍狀意者於行天莫如龍之義有當
與然漢武三品舊說係白金此係銅質殊不可解茲復寄呈二

紙惟高明審定之鄒縣鐵山石刻係懸崖峭壁甚難槌拓金石志所載乃其後段其前段寫經者志中漏載想阮文達公亦未之見也若欲全拓大非易事至尖山岡山兩處尙易爲力容與兩山再商可耳

致陳敘齋前輩

都門重晤餞別匆匆祇送行旌彌深悵惘覺南浦春波之句猶未能寫此情也乃承厚誼殷殷分金誌別倍感隆情恭惟老前輩大人元旋叶吉

特簡榮膺下風引企額頌時殷尤有羨者都市書畫摺載而行

譬○之○伯○樂○一○過○冀○北○羣○空○際○茲○春○明○景○媚○清○署○多○暇○四○壁○琳○瑯○如○遊○山○陰○道○上○似○此○清○福○詎○易○消○受○耶○近○過○廠○市○蘊○珍○齋○聞○張○文○敏○抄○寫○四○子○書○曾○蒙○問○價○現○此○物○尙○存○如○欲○得○當○可○代○議○晚○於○世○情○殊○少○倦○戀○惟○金○石○書○畫○之○好○一○往○情○深○而○不○自○解○故○知○同○好○者○必○有○同○情○而○不○憚○周○旋○於○其○間○也○現○考○差○期○近○只○得○勉○習○舊○業○惟○佛○腳○忙○抱○竊○恐○未○必○有○濟○耳

復步香南前輩

香翁老前輩年大人閣下客冬接奉瑤章深荷記注以魚鴻乏便裁畝久疎時深歉臆比惟納福珂鄉禔躬集慶爲善之暇著

作等身琴書生怡悅之情山水寄釣遊之趣較之十丈紅塵僕
僕車馬者真有仙凡之別相去豈止一倍耶侍去冬差旋如常
供職西江所得士今春聯捷四人庶常僅得一人仍憾其少臘
間移居香鑪頭條胡同現酒局既少棋興亦闌憶前時親雅教
樂數晨夕如昨日事望風懷想我勞如何蘭蓀懷芷諸君仍時
聚首近復重聯舊課消遣長夏惜不得就有道以求正耳

復吳子苾同年

客秋章江舟次幸獲一晤話別匆匆殊恨風帆催人之太速也
秋間接奉瑤函如親色笑敬稔春間始莅新任升華不茂爲慰

粵西雖係瘠區然政簡民稀素稱易治較之海疆要地其相去
豈○止○倍○蓰○譬○久○作○棘○手○題○文○忽○易○以○平○正○通○達○之○題○其○文○字○不
更○可○見○長○耶○西○粵○山○水○甲○於○天○下○弟○幼○時○路○過○曾○飽○饑○眼○至○今
猶○縈○夢○想○宦○遊○得○此○名○區○尤○堪○欣○羨○弟○供○職○如○常○春○間○京○察○循
資○可○得○一○等○現○在○名○次○第○八○閒○坊○尙○遙○或○可○博○一○外○任○不○求○亦
不○辭○固○無○成○見○存○於○中○也○自○夏○間○與○同○譜○六○七○人○聯○課○詩○酒○談
讌○極○友○朋○之○樂○近○於○畫○理○頗○復○留○心○初○學○弄○筆○尙○少○得○力○然○鑒
別○名○蹟○眞○偽○較○前○似○有○領○會○惜○不○得○一○就○正○耳○客○秋○差○囊○僅○餘
兩○竿○數○年○積○累○傾○筐○倒○篋○始○足○以○償○依○然○空○空○妙○手○西○江○之○水

固不足以潤涸魴也

致龍蘭移同年

暮春一別條已秋深回憶春明聚首至好銘心既冷暖之相關復形迹之俱化此等交誼出都後已成廣陵散矣兼承盛筵致餞話別殷勤催唱驪歌不忍分袂所謂黯然銷魂者非耶近聞邸鈔得悉詠莪子嘉兩同年得差同課中人尙未聞喜音大約留待典學後來居上爲閣下祝之弟秋初到汀接篆緣途中受暑轉成瘧疾痊而復作纏綿兩月有餘兼之地方瘠苦屬吏疲玩真有不可言語形容者因憶都門諸君子詩酒談讌樂數晨

夕豈止雅俗之分真有仙凡之判令人羨煞且妒煞也

致何子貞世兄

春明快聚契合獨深形迹俱化瀕行兼荷寵餞至今猶切感私只緣到汀後旋即遭瘧冬間始痊兼之案牘紛繁無暇握管又不能以肺腑之談假手於人以致函謝稽遲知我者諒不罪我也客歲吾兄竟未得差大出望外然春闈取才較勝定可操券而獲也弟外任初膺愧難報稱當爲之事執掌不辭非分之財絲毫莫取以期無負知己期望之至意惟汀郡情形疲玩苦累每出擬議言思之外閩省大勢亦多如此弟已悔此一行乃懷

茫復接踵而至何耶遙憶閣下鳳城久住良友多談心之樂厥
肆爲訪古之遊較之風塵外吏不啻天上神仙令人生羨幸敝
署後枕山麓結搆小園破屋兩三間寒梅十餘樹兼之雜花生
樹喬木連雲衙散公餘徘徊其間頗饒野趣是則差強人意者
昔微之以州宅誇於樂天弟之可誇於吾兄者賴有此耳

上杜芝農表叔

春明數載時近慈顏飲食教誨無微不至栽培至深且渥
自慚樗散備荷成全能不知感祇緣到汀遭瘡以致稟謝稽遲
尤深悚歉客冬閱邸報敬稔表叔大人華誕榮開

溫綸寵賁家學繼作述之美

天恩錫福壽之全朝野傾心冠紳翹首况姪受知最深其養軒
爲何如耶姪到汀半載地方情形公事則疲玩已甚民風則刁
悍異常吏治之壞更有不可言語形容者求一廉潔不苟之州
縣業已不可多得爲守兼優者更無論矣然州縣之不職非盡
天性之不善也大抵由於銀價昂貴錢糧不獲贏餘之故而銀
價之貴仍由於文銀出洋販賣鴉片之故不揣其本而齊其末
不清其源而塞其流雖智者恐亦束手似此情形乃當時所同
而汀郡則姪所目擊者也惟有矢勤矢慎爲所當爲之事盡所

所當盡之心斯則所可自勉而即以仰副栽培者耳

致蘇賡堂同年

至好關心數年渴別采艾之思豈筆墨所能罄耶去夏蘭江舟次遇迪甫兄藉悉賡翁仁兄年大人設帳會垣生徒甚盛教育英材其樂可知聞已無出山之意以吾兄識力之定心術之醇爲當今第一流人物方期爲

國家棟梁柱石之用乃竟高卧林泉殊不免爲天下蒼生失望耳弟去秋到汀業及一載地方情形屬吏之疲玩民俗之才悍公務之廢弛多出言思擬議之外由來已久整頓殊難惟有矢

勤矢慎分所當爲之事雖勞不辭義所不當得之財雖微弗受期與此邦人士相見以心此則所可自勉者愛我如兄更望示以指南俾有遵循幸甚幸甚世兄業已成童已應試否想雛鳳更清於老鳳聲也小兒在署攻讀學業尙淺然才質亦非下愚將來或成就尙未可知關河間阻未卜重晤何年紙短情長言不盡意

致雲舫宗叔

客春途遇得近霽顏藉慰渴慕以就道匆匆分馳南北依戀彌深旋聞台旆到京竟望部議變出意外深爲失望仍未識行止

若何近接硯農叔來信始悉早已吉旋珂里頤養天和定符遠
祝刻下雖少有波折然

天心眷注定當舊級珠還且古名臣往往因投閒置散轉得磨
鍊精神以爲異日經綸地步降大任者所以多困心衡慮也願
靜以待時勿以目前介介也姪去秋到汀地方情形屬吏則疲
玩太甚民情則刁悍異常各縣往往有聚眾抗官拒捕盜劫之
案竟須親帶兵弁彈壓拏犯自冬至夏業經數次此等民風縱
之生玩操之太迫又慮生變實難措手吾叔將何以教之耶

復何根雲同年

春仲接奉瑤章在遠不忘殷殷懇懇情見乎辭不啻當年把袂
談心景况快何如之敬稔年伯大人就養尊署公餘承歡兼有
筵開湯餅之喜聞之更深快慰曾聞諸閣下數代單傳今則一
索再索生生不已螽斯麟趾之祥詢非虛與竊意人世間功名
富貴猶屬人力所能致獨天倫之樂最爲難得閣下則諸福皆
備何得天之厚耶近聞耶抄欣悉榮遷少司馬從茲接武綸扉
文章經濟作一代傳人當不僅爲同譜弁冕已也承示盡心竭
力無弊不除具徵嘉惠士林之至意做鄉陋習場屋頗多積弊
仙九前輩視學時剔除綦嚴復經閣下一番振作不使仙翁專

美於前遙爲梓鄉人士額手誌慶也佐莅汀三載公私惻平年
穀順成詞訟稀少儘堪藏拙惟年已見惡雙鬢皆斑政事文學
毫無表見自顧頭顱輒呼負負拙書本無根抵况一塵出守筆
墨塵封更乏進境乃荷獎許過情詎刻畫無鹽正所以愧勵之
耶尊書深造有得來札神采飛動用力之久漸臻渾化當卽奉
爲楷模已什襲珍藏之矣聞包君慎伯以書法自負名重江南
伊有論書數則

國朝以來惟推尊鄧石如一人餘少見許者持論頗高惜未見
其筆蹟究不知所造何如想閣下曾見之果名稱其實否

致葉東卿年丈

前具蕪稟諒邀垂照近閱邸抄恭稔崑臣年大人開府東粵無
任欣躍伏惟年伯大人本傳家之義訓爲經
國之宏謨倍承

宸眷之隆益徵貽謨之遠曷勝欽仰姪汀南兩載建樹毫無今
秋因公晉省幸荷各長官青目有調攝首郡之議自顧疎慵力
辭而返幸平昔操持頗無惡於百姓亦見信於上游斯可慰慈
注耳都門年來想多獲古之緣尊藏富甲天下益以數年所得
不知又當何如前承允賜拓本數載尙未奉到不勝盼切閩中

古蹟唐以前者甚少汀郡蒼玉洞宋人題名劉燕翁想經送呈
清鑒玉華洞尚有題名數方此外福州鼓山尚有宋題名數十
種已命工往拓當續寄呈

致季雲宗兄

去秋曾布復函諒邀霽照魚鴻稀少倏又三秋離索之感何如
吾兄記名後尙未

簡放官運似乎微遲然刻日外任情形實無佳况即如弟到閩
兩載有餘爲難之事正復不少特因外官訴苦已成陋習只好
付之囊括而回憶春明樂事查不可得未嘗不寤寐縈之因念

吾兄回翔臺閣占盡人間清福旣饒朋友之樂兼多翰墨之緣
不禁豔羨且生妒也

復劉燕庭方伯

承示前歲賜書備言汀郡利弊深荷關垂曷勝銘感惟此函至
今未經奉到未識由何處沈攔去歲亦曾兩具蕪函並將近年
所獲異泉數十品拓奉清鑒來示亦未道及豈亦付洪喬耶關
山間阻麟羽罕逢能勿悵惘到汀兩載兢兢自矢惟期追步前
型幸見諒於長官亦無惡於百姓惟地方情形尙恐有未能盡
悉者風便敢祈詳悉見示俾得遵循不勝翹望惠到三巴香古

志廣博精詳披覽一過如讀異書可見珍寶自在人間必待其人而後顯耳蜀中金石向不多見做藏頗少尊處搨本想當富有漢魏六朝以前者開呈一單務祈檢賜唐以後物未免太繁不敢爲無厭之請倘擇其佳者見示固所願也汀郡古蹟蒼玉洞曾經鑒賞此外惟清流小玉華洞尙有宋題名十餘方想亦經摹搨矣省垣烏石山鼓山兩處宋人題名甚夥又有李陽冰般若臺篆及王審知造塔銘瑯邪王碑枯木菴題字皆五代以前物未識均經入鑒否蜀中所得宋鐵泉皆前人所未見者奇異可珍前在吳門曾見嘉定數品面文各異心異之而未得其

解今始知皆係蜀泉可見古泉之湮沒不彰者多矣做藏入闕後殊少增益惟得王氏大鐵開元一枚差強人意茲呈龍鳳一枚真而且精又權鈔大泉似僞作而足亂真者亦可備品敬祈
莞納

復季雲宗兄

秋間曾泐一函由杜繼園處轉呈未識何時得登記閣冬初讀首夏復書殷殷懇懇情見乎辭不啻接音容於几硯間回環捧誦頓慰離情尤感閣下勗我之切愛我之深
簡放雖遲然神仙福地占盡清華正不必顧下塵而色喜承示

不以利鈍係懷足徵高明之見迥殊流俗也弟歷碌簿書毫無
佳况秋間因公晉省荷長官垂青擬調首郡自顧疎慵不宜繁
劇且閩省首郡與他省異時有發審洋盜巨案既患言語不通
又無暇親自鞠訊倘有出入動關生死罪名此心何以自解是
以力辭而不敢就知我者當不笑其迂拘也數月來辦理考試
清釐家牘竟少半日之暇此邦民情雖欠純良尚非頑梗不化
惟屬吏之疲玩不振有非藥石所能攻者竟欲賦禁體而擱筆
只好吾盡吾心相安無事而已弟於名場素無熱念自出守以
來日擊宦場情形彌覺淡而無味惟金石書畫之好則仍然不

能割捨來示云書畫緣多聞之不禁神往且以不得一寓目爲
恨及閱至欲取則錙銖告匱欲置則寤寐難安二語又不覺失
笑回憶弟數載春明亦多奇遇每爲無員之才所制實有同情
何意吾兄實獲我心竟一言道破耶前奉懇代爲搜羅尊藏以
近易遠以平易奇卽以檢選之餘見寄已拜惠多多矣况曾經
法鑒之物與其棄諸厥肆固不若歸諸敝藏之較爲位置得所
也

致張筱諧同年

睽違數載無日不思屢聽榮遷久欲作書致賀祇緣歷碌少暇

石泉書屋尺牘卷上
又不肯以寒暄數語了事更不能以肺腑之談委之記室遂致稽遲知我者諒亦笑其嬾而宥其疎也恭惟閣下勲名並茂與葉崑翁中外輝映作砥柱於

熙朝不僅爲弁冕於同譜下風翹首欣頌奚如第二載汀南毫無建樹惟不作違心之事不受非義之財斯則差堪自問者至地方情形民風刁悍花戶以抗欠爲故智盜賊以搶劫爲尋常整頓已非易事而各屬因循疲玩更有不可救藥之勢卽常行公事往往頻催罔應平心而論亦非盡州縣之不肖也蓋辦公必需有資今銀價騰貴各縣錢糧以錢易銀絕少贏餘自顧不

暇縱有應辦之事只好置之高閣是牧令之疲玩多由患貧而患貧之故由文銀出洋之故此不但閩汀爲然各省大局皆然明知其弊而補救乏術然究不得以探本窮源之論目爲迂濶之談也現辦清查事宜各處虧短在所不免一經稽核自然水落石出但清查後恐依舊不能彌補則於帑項仍無益耳都門舊好飲射談讌諒無殊於曩時閣下公餘亦復多佳興否弟今簿書堆案回憶春明追隨之樂杳不可得曷勝今昔雲泥之感近接懷注信云曾得惠書言勸菴遺手足不仁之疾至今未聞北上究不知已痊否懷注與敝郡壤接去秋曾得一晤其景况

亦大略相似真所謂魯衛之政也一笑

賀何子貞典試廣東

子貞世大兄大人閣下前接還雲備承垂注殷殷情見乎辭置之案頭目焉三復良晤如親別緒如湧閣邸抄欣稔吾兄榮膺恩命典試粵東荷

北宸之綸綽收南海之珊瑚慧眼照臨奇珍並採其快何如且皇華載路流覽山川發抒胸臆詩卷尤當多添數寸此樂則尤讓吾兄獨得而非他人所同得也弟近來毫無佳况夏間辦理清查刻下督催交代事事多形掣肘長官雖雷厲風行而屬吏

之疲玩千態萬狀難於形容竟有不可救藥之勢弟介居上下之交其中難處之事難達之情有非筆墨所能罄不料宦場一至於此此後又將何所底止耶前示有不薄外任之意以弟愚見吾兄資俸已深冰銜即晉一路清華正不必以彼易此也承詢石齋櫟園兩先生遺墨到閩後不但未有一獲并目中未得一見汀郡地僻其陋可知吾兄寫竹有年刻下當已成竹在胸取之無盡所惠數幅以慰岑寂何如

賀季雲宗兄放甘涼道

秋抄接奉還雲即擬裁復旋聞榮膺

簡命觀察西涼未識旌麾何時莅任以致函賀稽遲非疎懶也
邇惟吉座允升新猷丕煥平昔經濟抱負一旦見諸施行必有
超出尋常數倍者不禁爲西方人士私心誌喜而此缺前任皆
以升擢而去芳蹤繼起諒不使專美於前柏府薇垣如同操券
又不禁爲吾兄頌禱之也弟近况平適而公事之掣肘則爲數
年來所未有春夏辦理清查秋冬催結交代業已大費心力近
復有屬邑逆倫命案縣令胆敢賄和置之不問既於心難安而
澈底根究又動多窒碍現在辦理尙無頭緒殊不料屬吏中有
此等魑魅可嘆又可畏也近來公務繁冗清興不免漸減矣

賀季雲宗兄保薦

七月抄接奉四月十七日復書殷殷懇懇情見乎辭觸我離愁
湧起紙上敬悉吾兄到甘後百事吉祥旣膺臬篆復列薦章從
此特結

主知青雲直上由柏薇而晉封圻爲國柱臣拭目俟之猶憶春
明數載交遊幾徧天下德行文學自不乏人而求其體用兼備
內外交修爲弟所服膺願學者吾兄而外曾無幾人此次之一
帆風利弟不僅爲吾兄賀尤爲當代得人賀也弟汀南數載無
所表見近來公事尤多棘手夏間催辦奏銷竭盡心力又復接

石泉書屋尺牘 卷十一
三
辦清查以積疲極累之區辦艱鉅難勝之事其掣肘情形可想
兼復制軍閩伍學使歲試供億煩多應接不暇宦况如此真同
嚼蠟屬邑重案承示不可輕縱與鄙意適符唯此案業經提省
另有委審之員案關縣令賄縱當事者不免有畏難之意至今
尙未定讞弟春間爲此晉省一次刻下又奉調入省僕僕道途
徒勞無益可見認真辦事之難弟駑駘劣質而所自信者幾希
夜氣未敢恬亡誠如見教之言弟自問無愧者在此而不合時
宜者亦在此現惟本道桂丹盟觀察同心共濟最爲契合而屬
吏則罕有同調世風如此良可慨嘆承惠書畫已領到思翁二

件雖真尙非其至者石谷卷老筆紛披南羽卷精力彌滿皆屬
不可多得之品足徵鑒賞之精也謝謝春間在省無意中忽有
所遇購得三十餘件多半可觀爲人聞來第一奇緣就中思白
衡山兩件頗有精神黃石翁畫松則與尊藏者小異然署款逼
真無疑惜不得一質高明也前函敬備手版乃宦場習氣應爾
既蒙呵責自問亦覺未安遵命不敢瀆呈然並非怵夏楚之威
也一笑

賀杜芝農表叔協揆之喜

夏間曾肅賀稟諒邀慈鑒近閱京抄敬悉榮拜協揆之命恭惟

表叔中堂德隆韓范望重泉夔

熙朝公輔捧日月之光華

盛世明良集星雲之景慶且吾郡自文襄公後久虛此席吾叔
接武前型允符眾望梓鄉戚誼翹首騰歡姪久沐薰陶夙叨知
遇下風引企曷勝冀軒姪臨汀五載潔己奉公幸免隕越惟此
邦吏治模稜遷就以爲通才怠緩因循恃爲故智姪凡事認真
未免不合時宜之請然有不如此則心不安者亦惟各行其是
而已

復張筱譜同年

客冬接誦瑤章備承垂注頓慰離悰前夏賜函竟未接到關河
間阻雖一紙音書亦不易達索居之感何如閱邸抄知閣下保
薦四人皆佐平素所心折者然諸君多屬迂拙一派非閣下獨
具慧眼恐不能相賞於風塵之外不但內舉不避親有當於古
名臣以人事君之義也欽佩之至佐汀南六載建樹毫無吏治
之疲玩公事之遷就竟有不可救藥之勢前此辭卻首都實因
知難而退並非有意鳴高旁觀者多笑其迂駮而磴磴自矢頗
不見惡於百姓是則自問尙無負初心者辱軀自午年病後總
未復元身雖無恙而心不耐勞疑是馬齒加長之故不意閣下

未及四旬亦有同病想皆係少年用心過度所致耶

致丁竹溪同年

接奉惠書諸承關注回環展誦如獲晤我良朋快慰奚似就稔承

恩樞密沐雨露之徧集星雲之慶遷擢不次忭頌良殷弟五載南汀愧無建樹近有屬吏賄和亂倫壽命重案經弟揭參一事撫軍業已入奏閣下應見奏稿可以得其大略其實尙不盡於此弟念小民如此兇淫縣令如此貪汙身任地方儻明知不問殊覺孤負

天恩問心有愧是以不敢含糊而憲意則於彼賄和亂倫兩層不願深究命案則檢驗爲憑奈件作初報有毒越六日又改稱無毒不知作何弊竇以致尙未定讞而弟已爲此晉省兩次僕僕道途徒勞無益冬間旋署又因粵東游匪滋擾敝郡毗連各邑俱辦防堵事宜風塵俗狀真不堪爲知己告也

復呂鶴田同年

客夏接讀還雲如親塵教旋聞遷擢之喜不勝欣躍祇以俗務煩冗久稽裁賀知我如兄當不責其疎也從邸報中披讀奏章正言莊論深有合於引君當道之義從此上結

主知由卿尹而登台輔他年名臣傳中虛席以待又不僅爲同
譜生色已也欽佩欽佩弟汀南五載愧無建樹此邦吏治大抵
以遷就爲圓通以持正爲迂拘實非我輩所宜數年來惟與桂
丹盟先生性情心術最爲契合今丹翁又引疾而去更少同心
徒喚奈何

復吳子苾同年

近接新正來札如對芝顏捧誦回環不忍釋手就稔福祿勳名
與春並茂快慰良深黔中年豐事簡公餘尙多佳興較近畿酬
應紛繁者似屬此善於彼然粵匪不靖隣疆密邇防堵調遣又

費一番籌畫矣弟宦况平平清查之瑣屑詞訟之支離已多棘
手近因豁免積欠民間誤會以爲新糧俱豁現奉部文仍需徵
收鄉愚無知藉詞抗欠催徵尤屬不易昔有三知難做之言邇
來府州縣之難更倍於昔再十餘年不知又當何如矣賜下五
銖范搨本背有年代可珍漢五銖久無定論得此可爲確據與
定寶鈔曾購得否元鈔世傳有之金鈔未之前聞此等奇品先
需防偽近來陝中贗品亦多不但吳門也空首布初疑爲商物
今觀其字多列國地名如留卽屯留是卽銅隄不但商周吳宋
之顯而易見仍屬周泉無疑大者僅一字世多有之小品兩字

石泉書屋尺牘卷下
者甚少尊藏數品俱可珍也書畫之妙其趣不在金石以下承
示取其佳處與我意會而不專重其名非深得此中三昧者不
能道此語然弟更有進一解者大凡名家筆墨雖不經意亦有
神采動人其不能愜意者卽贗鼎也高明亦以爲然否

石泉書屋尺牘卷下



致李雲宗兄

利津 李佐賢 竹朋

客秋曾具復函恐郵遞不達故交黃莘翁附寄都門轉呈究不
知何時入覽久未接奉來書關樹嶺雲徒勞悵望覺采艾采蕭
之句不能喻此情也去歲入覲
天顏想荷

帝心簡在竊意秉臬開藩可期旦夕特未知福星移照何方是
以久疎修候乃遲之又久尙未聞喜音何也將毋大任之寄不

妨遲回慎重以有待耶方今需才孔急之時匡濟抱負舍閣下其誰非弟一人之私言阿所好也弟聞汀六載寡過未能自辭謂首郡之後長官以弟爲無志進取故明保卓薦兩無所獲然自問亦無過人之處并不作不平之鳴惟公事掣肘則日甚一日詞訟之離奇清查之煩瑣固不待言近奉

恩旨豁免積欠民間誤會併新糧多不肯納撫字難催科尤不易時深惕惕數年來鬢絲點雪眸子生花漸有人老境之意辦公之外踽踽涼涼并無可與談之人回憶春明聚首翰墨因緣真屬人生不可多得之樂惜當時之不知也閩中書畫絕少而

去歲入省兩次竟獲名人真蹟數種繼又獲梅道人墨竹一竿風致翩翩與尊齋顧定之二幅不相上下在此邦已屬罕購甘涼亦非文物之區尊藏尙有增益否漢隸敦煌太守裴岑碑在巴爾庫爾城距治疆密邇其真搨本如尙易得望惠數紙若翻刻本則敝處有之不必寄也

復賀祁幼章方伯

春間接奉客歲小陽月由清遠行轅復札於軍書旁午之時猶垂念故人在遠不忘殷殷懇懇抑何其情之真而意之摯耶雖誦回環真所謂置書懷袖三歲不滅者矣前聞開藩之喜久欲

修賀特不知旌麾幾時北上是以遲遲近閱邸抄恭稔復膺
寵命移曜南都暫留東粵膚功奏保障之勲

宸眷荷倚畀之重封圻卽晉欽頌莫名英清土寇業已殲除刻
下聞已凱撤唯粵西賊勢猖獗擾及高廉一帶不知何日竣事
榮莅新任計在何時尙祈示慰閩中宦况有江河日下之勢佐
自分迂拙不合時宜惟有盡其力之所能行乎心之所安長官
之知與不知屬吏之諒與不諒聽之而已前呈銜名又承呵責
吾兩人情同手足莫逆於心當不讓古人乘車戴笠之盟原不
必如此拘泥但前歲曾經約定閣下年長於我卽當呼我爲弟

佐亦遵命將世誼官稱一概抹卻乃來函謙抑仍循館稱且不
以老兄自居何客氣之未除而欲厚於責人耶請自今始閣下
若用館稱卽當以官稱奉還若呼以兄卽當以世誼相稱若以
弟呼我當遵前命不復改矣此次仍具銜版明知見責而故爲
之者所以報也一笑

復銘東屏同年

捧讀手翰如聆齒芬辱承雅贖退食餘閒子細玩味鐵筆則規
摹鐘鼎韻語則咳唾珠璣文詞冰雪聰明真不食人間煙火者
案牘叢中覩此佳製令人心目一爽勝似百朋之錫矣猶憶昔

年過匡廬以未得登覽爲憾今讀紀遊一篇不啻身歷其境且
新詩妙畫逸興遄飛恨不追隨芳躅一抒懷抱也謹呈緝幅所
將勝景圖寫一二俾少文得卧遊何如弟忝列分符愧無建樹
州治郡城壤地相接人情風俗約略相同撫字催科均難措手
時切冰淵之懼名利兩途早已置之度外公餘惟藉金石書畫
消遣悶懷覺結習之未忘笑故態之猶存惜知音寥落絕少同
心回憶西江從事琴韻棋聲彼此互答文心畫意議論相投忽
忽如昨日事乃今咫尺之遙渺若山河之隔停雲在望我勞如
何附呈古泉百枚蔡帖一部重訂金石之盟非爲瓊瑤之報也

致六舟和尚

六舟上人如晤午歲袁浦旅次得聆教言深慰渴慕承碑版之
投贈結翰墨之因緣別後時縈夢轂祇以關河間阻未識行腳
卓錫何方以致久疎修候去歲晤鹿春如觀察方知係上人知
交藉稔主持淨慈禪院山色湖光悟上乘之妙諦吉金樂石結
獲古之深情佳况良多頌忱曷旣佐向有同好近將各家搨本
彙集哀然成帙而缺略仍復不免尊處爲金石淵藪祈惠寄以
補不足何如

致劉燕庭方伯

違別已久馳慕時殷自台旌北上以後未識稅駕何處無從致
候近晤毛子剛司馬方知榮旋貴第并未回東福履吉羊諸慰
頌臆竊意人生唯宦成以後林下清福最爲難得况先生以著
作○之○精○神○假○優○游○之○歲○月○領○略○林○泉○之○趣○探○討○金○石○之○編○雖○馬
千○駟○祿○萬○鍾○豈○能○以○彼○易○此○耶○佐○閩○汀○五○載○幸○有○芳○躅○在○前○遵
循寡過然民俗之刁蠻屬令之疲累較之當年敷治之時情形
懸遠撫字旣難催科尤爲不易時深惴惴公餘仍以金石翰墨
消遣悶懷近得東卿年丈寄到搨本七百餘種并平日收輯紙
墨彙集成帙惜路遙不能就正做藏古泉近年無所增益尊藏

數年來諒有新得并西安所獲之梨刀范均望以拓本賜我前
歲搜得清流玉華洞宋題名十餘種近接子苾書云尊藏所無
茲寄呈一分聊以備品外通文并銘一紙亦闕刻之難得者并
奉清鑒

復銘東屏同年

立秋日復奉還雲並百壽印章屏幅吉祥典雅巧製翻新拜領
之餘且感且佩鐘鼎諸刻想更多佳趣承允賜觀當拭目以待
幸○勿○笑○爲○得○隴○望○蜀○也○法○繪○天○池○圖○如○已○脫○稿○卽○祈○擲○下○幸○勿
裝池緣此係八幅之一需合裝屏幅不但先覩爲快也武彝之

勝近在隣封竟未得一遊時勞夢想此願正未知何日償矣茲呈近作數首并內子畫蘭二幅統祈指教外圖章一盒泉譜二帙聊以伴函古泉繁多難於徧拓茲拓周秦以前之刀布圖法漢以後者從略其實古文奇字已盡於此矣又摺扇一柄祈法畫并書鐘鼎文字俾得奉揚仁風幸甚

復葉東卿年丈

接奉手書如承面命並惠大著及諸搨本恍披宛委之編似讀金石之錄日焉三復錫勝百朋感銘私忱曷可言喻敬稔著述歲月備九疇五福之全杖履精神符益壽延年之頌下風引領

欽牀難名姪臨汀六載潔已奉公雖建樹之未聞亦愆尤之幸免公餘考古結習難忘唯此邦謫陋殊少獲古之緣命寄搨本今將數年所獲一併寄呈外具清單一紙統希鑒收閩中石刻以大厯般若臺爲最古此外五代數種俱可取至小玉華洞宋題名雖時代較近然係前人所未見者亦可備品古泉入閩後殊少增益茲選拓四卷多半係都中所獲雖不足以當大觀然做藏佳品已盡在是矣燕庭春士我鷗堯仙諸君子所獲古泉姪俱經摹搨益以做藏彙爲古泉匯一書仍恐不免缺略承示向收泉拓本尙多如有做藏所無者仍祈以副本見賜

致銘東屏同年

去○役○回○汀○接○奉○手○翰○知○前○函○已○達○青○覽○承○惠○屏○扇○及○諸○搨○本○鄭
虔○書○畫○兼○長○歐○陽○金○石○并○考○不○圖○復○見○於○今○日○拜○領○之○餘○且○欽
且○感○弟○癖○嗜○金○石○與○吾○兄○同○而○力○不○能○致○亦○同○物○聚○於○所○好○而
得○於○有○力○之○強○不○信○然○歟○不○得○已○取○其○小○且○易○者○專○收○古○泉○一
門○十○餘○年○來○所○集○漸○多○又○益○以○燕○庭○子○敬○春○士○我○鷗○堯○仙○諸○君
子○藏○泉○搨○本○哀○然○成○帙○極○泉○譜○之○大○觀○且○多○古○人○所○未○見○者○摩
抄○考○訂○聊○以○自○娛○願○與○同○志○者○欣○賞○之○不○計○旁○觀○者○之○非○笑○之
也○泉○譜○自○六○朝○迄○明○著○錄○者○十○餘○家○今○皆○不○傳○所○傳○者○惟○宋○洪

遵泉志一書又復舛錯荒唐不可爲典要

國○朝○著○錄○者○十○餘○家○較○精○覈○於○前○人○然○亦○各○抒○己○見○迄○無○定○論
他○年○得○暇○擬○集○諸○家○之○說○而○折○衷○至○當○匯○爲○一○編○然○非○一○朝○夕
之○功○蓋○有○志○而○未○逮○也○鉛○板○摹○刻○鐘○鼎○文○此○法○奇○創○幾○於○亂○真
而○弟○更○有○進○一○解○者○定○武○蘭○亭○雖○佳○究○不○若○昭○陵○真○本○之○可○貴
我○輩○於○彝○器○不○能○備○致○而○拓○本○則○尙○易○搜○羅○弟○向○在○都○門○每○遇
友○人○古○器○之○有○銘○者○時○借○摹○搨○近○又○得○葉○東○卿○年○伯○自○粵○寄○來
搨○本○七○百○餘○種○鼎○彝○居○其○半○雜○器○居○其○半○頗○有○可○觀○惜○不○得○一
質○高○明○也○尊○齋○所○藏○鼎○彝○所○將○銘○款○搨○賜○以○補○所○不○足○何○如○內

石泉書屋尺牘 卷下
子寫蘭苦乏師傳任意塗抹乃承獎藉逾分且獲瓊瑤之報雖
大君子善善從長然過情之譽殊覺愧不敢當某夫人畫蘭曾
見贗本晚香蕙卿兩女史畫不但未見并且未聞如尊處有其
筆墨祈賜借一觀仍當奉趙也弟現因有會驗之案奉檄調省
計月內當赴會垣回郡約在黃花節候矣

復祁幼章方伯

幼章仁大兄大人閣下春間接奉還雲殷殷念舊情見乎詞良
覲如親離懷若湧彼時緣留滯榕垣俗塵蝟集致未作會然每
憶芳型輒一披閱覺音容恍如晉接也吾兄以柱石之才膺屏

藩之任卽邀

寵眷指顧封圻天末故人將望之於霄漢間矣承示公事繁難
自係實情目下惟西北一方尙稱善地東南諸省景况皆不可
問不獨江南爲然今歲黃水又未合龍賑卹修防事事關要鴻
才碩畫想造福蒼生者不少也弟去歲因揭參屬吏賄和命案
一事撤任留省今夏案結尊處閱邸抄可知梗概但此案姦毒
賄和皆確現今定案並非真情特以毒係烟土且甚輕微以致
檢驗渺茫遂將一切情節化爲烏有天下事竟有不可以理斷
者此類是也長官以弟於此案僅據原告呈詞揭參並未承審

定○讞○尙○無○不○合○惟○失○察○委○員○舞○弊○交○部○議○處○於○孟○秋○已○奉○飭○回○
任○惟○此○邦○民○風○吏○治○俱○所○難○言○而○此○案○天○理○人○心○兩○無○可○據○此○
後○若○認○眞○整○頓○其○勢○既○有○所○不○行○若○與○俗○浮○沈○此○衷○更○難○以○自○
問○弟○雖○不○敏○於○古○人○合○則○留○不○合○則○去○之○義○聞○之○稔○矣○現○已○具○
文○引○退○計○冬○春○間○卽○可○歸○里○此○後○或○再○作○出○山○之○計○抑○或○從○此○
釣○遊○終○老○田○間○均○當○任○其○自○然○行○所○無○事○而○舊○好○諸○公○臺○閣○封○
疆○蒸○蒸○日○上○竟○作○局○外○閒○觀○倍○覺○有○味○閣○下○得○毋○笑○其○甘○自○暴○
棄○否○耶○

致季雲宗兄

客臘接奉季秋杪惠書如獲晤語久欲裁會緣年來宦况惡劣
心緒焚如無從抒寫以故筆欲下而復停者屢屢然吾兩人心
交有素雖數年猶如一日千里猶如一堂固不在音問之疎密
也去冬吾兄榮攝藩篆未識何時交卸刻下想已吉旋本任承
示甘省邊徼番氛滋擾情形可爲太息然目前西北一面尙稱
善地若東南則疲敝不堪更有不可言語形容者矣弟秋初回
任自揣迂拙於此邦殊不相宜且先塋被水先兄謝世弟屬責
無旁貸亟需旋里修墓現已具文引退俟接篆有人卽賦歸來
此後出處尙難預定閣下得毋笑其偷安否耶閩中書畫緣慳

石泉書屋尺牘卷下
甘涼邊地竟有文沈長卷可稱奇遇吾兄不但慧眼過人卽論
獲古之緣亦令弟甘拜下風矣大小兒貽良仍回東應試次男
貽雋年甫九齡近來緣內子多病并無妾媵子息未能繁衍頗
有納寵之意而難其人此亦如書畫之緣不能勉強者也承詢
并及

唁杜繼園筠巢昆仲

接閱京抄驚悉閣下遭逢大故伏思中堂表叔素履康強此次
查工南下縱因跋涉違和何致遽爾仙逝不勝駭異繼兄悼亡
之後又復失怙筠弟奉命留京又未得前往以伸哀慕其痛尙

何待言第念表叔位極人臣

恩渥

聖主

予謚文正崇祀賢良特

旨入城爲當時所僅見

親臨賜奠更近代所希聞洵大備夫哀榮已無憾於存歿况太
表叔大耄之年表姨亦春秋高矣遭此拂意正賴閣下委婉寬
解儻哀毀過情非所以慰高堂也佐夙承表叔訓誨垂愛逾恆
聞信之餘涕零難已况吾三人至好如同手足何敢以泛常唁

慰之言進然禮當有節孝重守身當不以鄙言爲不然也

賀張子威內弟

接閱京抄敬悉閣下疊承

寵命持衡黔省旋守閩疆從此榮膺

天眷直上雲遠曷勝欣賀雙旌何日出都未得確信吾兩人契
澗數載滿擬藉得一聚乃台旆南行之日正鄙人北上之時豈
燕雁代飛耶抑尹邢相避耶殊無以解之

致杜繼園筠巢表兄弟

客冬曾布唁函交閩省招差帶呈計早達左右數月來僕僕道

途未遑修候然閱春間京報敬悉

聖主垂念表叔勲蓋又

遣親王致祭方知靈輿尙在都門未知窳窳之事定期何時閣
下曾先返家鄉相度塋兆否堂上起居諒極康健尙能達觀推
解否左右就養想費盡無窮孝思也佐去秋引退急思歸里乃
長官雅意欸留致有耽延仲冬始得卸篆臘初起程由江西紆
道抵浙已近花朝彼時逆氛擾及金陵江口不靖阻隔行程而
杭人亦惶恐遷徙不遑安居只得返權金華聊當桃源之避但
京口金陵尙未收復未卜何日肅清重整歸帆遙望家園不勝

百身書屋尺牘 卷下
五
蘊結逆匪嗜殺天怒人怨官兵非不衆多何難撲滅所以致此者總因海疆見敵卽走習爲故智其不散者又半多嗜好臨陣之時未必非上癮之時將士如斯安望其殺敵致果耶眞可爲長太息也

致杜繼園表兄

近接去秋覆書係由武林密得軒明府處轉遞來者數千里魚雁竟未浮沈令人稱快閱邸抄敬悉太表叔榮膺賞壽閣下亦超晉升階德門迭受殊

恩海內同稱異數不獨弟一人代爲歡欣鼓舞也都門戒嚴慮

有奸究溷跡閣下職任稽查良非易事聞靜海餘匪現又西竄未識畿南一帶尙能安堵否吾鄉團練只奉行故事幸僻陋海濱非奸人所覬覦耳弟回里後相度先塋被水情形較重今歲擬動工修理而工費浩繁正不知若何措手兼之晚芳舊恙時止時發以致家務瑣屑皆需弟隨時經理彌覺俗狀不堪以對知己告現於城南購得小小莊田一所茆屋十餘椽花果百餘樹以爲憩息之地廿餘年名利場回首如夢今則黃梁飯熟矣但願消閒無事優游餘年此外尙何奢望耶

賀杜繼園續絃並

賜紫禁城騎馬

近聞

賞馬之

恩恰值乘鸞之喜玉鏡臺前重看璧合銀河橋畔笑指星聯且
樞垣當待漏之時繡閣賦催妝之句攬轡澄清
天上荷優隆之眷入幃笑語聞中聞靜好之音洵近時之佳話
也欣賀欣賀

致吳子苾同年

客冬接奉台駕出都時手書以羽便罕逢久稽裁會諒不見罪
吾兄留京之後視學浙省旋晉升階迭聽下風曷勝忭慰閣下

當年外任最早惟以未持文衡爲憾乃他人皆先得文差而後
外任閣下則先膺外任而後文差比文章之有變格似詩家之
有拗體倍有餘味也今夏嫂夫人仙逝吾兄情篤伉儷能勿悲
悼但古云修短隨化終期於盡達人之委心任運與聖賢之知
命順受似異實同外此更無善處之法閣下已逾壯年幸達觀
順受勿過悼以損玉體則故人所切禱者也弟里門跼伏今夏
值黃水漫溢由濟入海吾郡被害尤深先塋逼近河干不得已
另覓吉壤遷徙而敝廬不禁風雨又須重爲修理數月來殊少
暇晷惟小兒貽良秋闈幸附榜未差慰垂注耳近得兩占一觀

俱非贗品又將十餘年所獲金石彙爲一編共訂卅函哀然成
帙尙有可觀惟鐘鼎文多有不易辨識者載酒問奇悵子雲之
遠隔何時得近光儀一爲質證耶

致季雲宗兄

十年濶別兩地相思憑一紙音書以達積愆正如一部廿一史
不知從何處說起癸丑年接奉由甘涼遞到敝縣之函殷拳雅
意在遠不忘每一展閱如相晤語祇以吾兄升任都轉旋即引
退不知行旌暫住何所無從問訊致難裁會今春來京昭博古
齋主人方知早已榮旋卜居盤山之右並悉起居安吉潭府祥

和○下○懷○深○慰○且○窈○列○峯○巒○受○烟○雲○之○供○養○案○盈○書○畫○結○翰○墨○之
因○緣○此○人○間○不○可○多○得○之○清○福○意○者○吾○兄○固○天○上○散○仙○下○謫○塵
世○者○故○遭○際○迴○異○尋○常○耶○諸○賢○阮○漸○次○成○立○蘭○玉○盈○階○更○多○佳
况○現○今○已○應○試○否○想○雛○鳳○更○清○於○老○鳳○聲○也○弟○自○王○子○引○退○丑
春○路○出○江○浙○適○值○京○口○失○守○程○途○阻○滯○至○冬○初○始○得○旋○里○前○歲
因○先○塋○被○水○修○築○土○隄○竟○無○濟○於○事○不○得○已○於○去○歲○敬○擇○吉○壤
遷○徙○甫○獲○竣○事○而○黃○水○暴○至○猶○屬○不○幸○中○之○幸○再○敝○廬○多○年○朽
敗○亦○需○稍○爲○修葺○以○蔽○風○雨○是○以○雖○有○告○退○之○名○並○無○閒○居○之
樂○幸○小○兒○貽○良○鄉○會○兩○次○俱○得○挂○名○榜○未○堪○慰○錦○懷○弟○今○因○小

兒應試一同北上爲春明訪舊之遊前月本擬走謁以暢積愆
已定於廿六日命駕矣不意廿四日痔疾大作不出戶庭者廿
日今雖痊可仍未脫然致難如願豈吾兩人一晤之緣亦有定
數於其間耶今擬五月中旬回里他時尙擬來京必當造訪以
償此願也

復范仲敏兄

別離又三載矣去歲屢過貴邑不得一晤爲悵近接來書殷殷
拳拳如親色笑旣慰遠道之懷彌增離索之感並悉吾兄近有
抱孫之喜家庭聚順繞膝含飴樂可知也弟去冬來京數月來

安置漸次就緒雖居人海之中時結地偏之想惟於金石書畫
結習未忘藉作消遣然不免近於玩物有乖道德清淨之旨以
較吾兄之清修絕俗不染一塵殊愧遜一籌耳迂叟記筆墨簡
潔摹神惟肖古人有作生傳者此有其實而無其名命意旣超
取徑獨別尤可傳無疑也小京賢姪醅謹老成堪繼家學下榻
敝寓小兒藉得師資深爲欣幸來函致謝之詞愈令人汗顏耳

致興宜泉司馬

別來今六載矣回憶前塵渾如昨夢所不能忘情於嶺外者惟
荔支與閣下耳前歲接奉惠書當卽修函奉復交張子威附便

在吳書屋內牘 卷一
遞呈未知何時得達典籤邇來鱗羽罕逢無從問訊起居近晤
慎齋令嗣崇世兄詢悉吾兄加銜之後業已卽真從此一帆風
利榮授名邦遷擢指顧無任祝忱又聞閣下有喪明之痛兼有
抱孫之喜始而爲之扼腕繼思無可如何之事只好委心任運
猶幸善人之必有後也弟里門跽伏三載有餘幸小兒貽良附
名春榜觀政秋曹弟卽於冬間攜眷就養來京賤軀頑健如昔
然雙鬢全皤兩日生眩已如文家之漸入老境自愧疎慵已不
作出山之想長安舊好亦寥落無多二三知己讀書論詩或結
金石之緣兼寄琴棋之好消遣時光屏除妄想所堪告知我者

如是而已

致季雲宗兄

去秋接奉還章感雅意之殷勤知近况之佳勝捧讀再四慰喜
交并彼時正值東裝北上未及裁畲入都後正擬修函奉候乃
奉惠札先頒問訊周詳情誼懇至益令人神馳左右大作盤山
記及惠寄詩篇名山勝景雅人深致摹繪入微每一展誦且欣
且妒吾兩人性情嗜好出處遭際大略相同兄之勝於弟者以
林下之高風享山中之清福弟則家園化爲澤國僑居塵世之
中旣非久計欲踐烟蘿之約又乏餘資只得委心任運聽天公

之位置而已客冬小陽抵都經營草朔殊少閒適之樂幸密邇
廠肆近日稍暇散步消遣興致不減疇曩而名跡絕少亦如人
才之難做藏增益無多近事南邦情形依舊豫皖至人相食皖
中軍餉不給元翁尤難措手畿內大鐵泉忽廢當事者三令五
申仍未暢行然不行弊在目前果行又弊在異日正未知孰得
與孰失也

致許印林學博

清淮一別倏逾十年關河間阻音敬多疎尤深歉仄近聞閣下
就聘海邑著述宏富探五車之秘籍作一代之傳人無任欣頌

子苾謝世失此良友令人扼腕聞其遺書經閣下較定付託得
人深爲慰藉弟曾見其摺古錄一部較訪碑錄增添一倍若付
梓已屬大觀此外不知尙有何著作聞江南沈舜卿先生亦有
金石續編之輯於萃編外增出千數百種亦成而未刻與子苾
之書諒必互有詳畧倘能合參更爲雙美也弟近年收輯金石
文字亦不下數千種而古泉尤爲專門惜近在咫尺無緣把晤
一就正也

復季雲宗兄

日前信宿尊齋挑燈話舊把酒談心十載離情一朝快慰真人

石泉書屋尺牘 卷下
生不可多得之樂乃承雅意綢繆既遊畫裏之山又贈山中之
畫別後心感無已正擬修函致謝轉承手札先頒捧讀回環如
獲重晤屬致嘯盒子貞之語均已代達子貞惟笑而不言已於
前月回歷下矣弟歸來依舊近值弟婦抱病日與藥爐爲伍亦
乏佳况惟恃海王村爲散悶之遊新獲文衡山雪景玉石谷仿
江貫道兩大幅惜絹素稍黯然議價廉亦可喜也尊藏擬分散
之說前疑爲戲言不料果有此意當亦禪宗所謂解脫者耶來
單告知厥肆中人皆苦其價昂同人中間有一二問價者又以
不得一見難於懸議爲辭倘能將各件寄來價值量爲議減或

有成未可知也書畫題跋暫存敝齋容後奉趙緣尙有擬抄錄
者愛吾廬書畫記如錄成亦望寄下一觀帶上冊頁四開祈將
大作古近體詩遂意書之弟擬作一盤谷訪雲圖並請吾兄作
一盤谷留朋圖合裝一冊題詩於後以見吾兩人之交誼踪跡
思之未果或者佳作先成弟得續貂亦有合於兄先弟後之義
也然否

復季雲宗兄

復書敬悉春明之遊竟未肯命駕上界神仙慣住十洲三島固
不願下臨塵世耶近中潘紱庭邀弟聯轡入山奉訪弟因去秋

石泉書屋尺牘 卷下 七
纔晤頗憚車馬之煩是以未果明歲如得暇或更續前游未識
清虛洞府亦嫌此凡人之擾否見責書畫之貪良是然我輩富
貴勳名均已置之度外惟餘此翰墨之緣未能忘情似亦不爲
太過若並此無之則與虛空同此清淨去仙佛地位不遠不但
弟遜謝未遑恐吾兄亦尙未臻此境界然亦吾兩人所當共勉
者也近見多心經一冊如初寫蘭亭恰到好處乃松雪生平最
得意書價昂竟不能得與去歲所見之米書多景樓詩冊同一
繫懷貪而不能饜其欲奈何並陳以博吾兄一粲

復張翼南同年

伴來接讀瑤章敬悉壹是已將尊意轉致蕉鄰俟有回書再行
佈聞拙詩譬之蟬噪蛩吟不過自鳴天籟並未窺古作者門戶
乃荷大作賜題並多獎譽過情之語未免刻劃無鹽令人汗愧
鄙意欲續吾郡詩愧識解之未周慮見聞之不廣正思呼將伯
之助而來函有欲代任搜採之意深慰鄙懷竊思詩鈔與詩選
不同無妨從寬雅兩山人已有此議向來選家多照昭明文選
之例而遺今人而近時余秋門之續山左詩已不拘此例卽符
南樵之正雅集亦然鄙意循此成例兼收時人吾兄大作卽吾
鄉文獻所關斷不可缺祈錄百餘首寄下以備彙入再貴府先

輩或有藏稿以及北鄉過去現在之詩人零箋碎什均祈代為廣收博取備選凡詩人之科第官爵字號均祈詳示仿照前鈔存文卽以存獻也

致汪菽民明府

別久思深情同兩地前接手翰備荷注存今聞部復已回榮蒞新任諒卽在邇以雅人而宰名區仙吏風流於茲未墜想更有
一番佳况也代散泉匯其或繳價或繳書者祈便中擲下其催
取不到者只好聽之左近輯做郡詩鈔已竣而刊資不易故不
能不借此書價以助棗梨卻不必刻舟求劍也茲有舊僕張源

曾在敝處及呂秋塍尙學川兩學使署中服役刻下賦閒仰慕
仁宇求爲噓薦佐明知尊處人浮豈肯泛作薦牘但此人非尋
常謀食者比伊向於裝訂書籍裱補書畫位置書室琴樽點綴
園亭花石頗具精心俱可人意且性嗜繪事出筆尙無匠氣素
有願侍几硯爲青藤門下走狗之意佐因其志可嘉故予一函
爲引倘蒙錄用固不僅效犬馬之報已也

上祁春圃相國賀令嗣叔和捷南宮之喜

春明侍側備荷青垂教誨飲食關愛周至叩違以來覺銘感之
忱與依慕之私猶交縈五內也近閱邸抄欣悉子和七兄榮登

金榜聯步玉堂恭惟世伯中堂闕閱增榮瀛洲繼美累代清華

洵熙朝之盛事一家作述播海內之令名朝野傾心中外額手况
姪之受知最深者耶翹企慈雲曷勝欣忭姪於閏月中旬抵里
孟夏為歷下之遊勾留月餘明湖水色千佛山光攬勝尋幽與
子貞小山諸君子時相晤對頗得友朋之樂並結山水之緣較
勝里居之鬱鬱懷抱也頗思置一側室而訪求未得其人何緣
之慳耶抑尚有待耶只可俟之而已知關注念謹附以聞敬請
鈞安虔叩崇喜不備

謝劉子重惠壽聯團扇

七年濶別兩地相思音敬久疎尤深歉臆乃蒙在遠不遺以馬
齒加增辱承厚賜詩聯獎譽感舊雨之關情紈扇團欒幸仁風
之被我隆儀拜領銘篆五中就稔近履吉羊為慰但未知實缺
已榮補否金石書畫之緣清興諒無殊於曩日惜關河間阻不
得造君子甄館共賞之也

致羅椒生同年

嶺南一別十餘載矣思君之心與日俱長去歲聞閣下榮膺
天眷復起東山為歡欣者累日慶

石泉書屋尺牘卷一
三
盛世之得人幸蒼生之蒙福不僅爲同譜生色也祇以升沈異轍是以音敬久疎然吾兩人相信以心久約不忘雖判雲泥當無忘車笠之盟也曩徐恭勤公在日深贊閣下精通禪理想慧根夙具加以好學深思自當超悟上乘弟於禪學未能深入然思釋教之空道家之元與聖學之無聲無臭均屬歸於太極無極流雖異而源則一也初學皆當以清心寡慾爲第一義惟知之非艱而行之惟艱耳弟辭官後於崇高富貴聲色貨利凡常人所欣羨者頗能淡然置之惟外物之緣未能盡屏本體之明未能盡復斯則撫衷滋愧者愛我者將何以教之耶

復季雲宗兄

季夏接奉由都門寄來手書并讀佳什無限深情溢於楮墨十載凋悴一朝快慰弟去冬因得孫未見入都一行小住卽旋曾晤汪嘯翁詢及吾兄雖入老境而起居如常只緣匆匆出都未及修函專候致興問罪之師夫復何辭然見責之切彌徵見愛之深也如嫂謝世吾兄遭此拂意誠難忘情但佛說因緣二字最能補儒教所不及從古無不散之緣願達觀者之一視太虛而不必過傷也諸賢阮成立循分讀書繼續家學此卽吾兄娛老豫順之境至其科名之遲速原可居易俟命吾輩所重固在

此不在彼也弟自申年歸里旋膺濟南講席者四載近年家居賦閒而遭際時艱黃水既冲塌城垣賊蹤復屢犯隣境修築防堵時協同邑宰辦理頗形勞瘁幸屬外患而非內憂故身雖勞而心仍泰金石書畫之好仍未忘情編成古泉匯一書因非吾兄所欲觀者故未寄呈茲呈拙詩二帙卽希教正近又輯敝府詩抄尙未付梓又擬編書畫鑑影尙未識何日竣事大小兒供職都門二小兒攻讀待試是近况之堪告述者

致張翼南同年

接奉還章如親警效賜題泉匯洋洋大作暢所欲言令人有觀

止之歎叨榮施多矣謝謝昔坡公贈與可有料得清貧饑太守之句今佳作亦有隻哉汀州貪太守之句先後同符惟此一字之褒殊愧不自安而又無說焉以辭之則亦惟不辨而受之可乎一笑就中東曉市上四字擬改海王村裏綠敝藏泉多得諸厥肆非獲諸曉市欲紀實也

致李午山方伯

夏間曾由都轉寄賀函兼鳴謝肌計當早登記閣恭惟午山年兄方伯大人屏藩著績

綸綍承

恩卽晉封圻莫名祝盼僕連年辦理河防事宜諸多棘手不料今歲更有甚焉者自孟夏賊入東境往來做郡一帶不下十餘次距做縣城池或數里或數十里出沒無定警報時聞惴惴恐懼城垣已殘缺不固民心復良莠不齊經費既難於持籌號令更不能畫一僕介處其間若袖手旁觀則身家性命所關慮有池魚之恙若計圖萬全又苦無良策幸自伏汎河水泛溢做邑宛在中央賊不能渡較他邑受害微輕豈邀天憐而宥之耶然痛定猶思痛也因思十餘年挂冠早退不過偷閒冀得自由耳乃在家之難更甚於在官自問殊覺無謂矣

復鮑子年閣讀

客冬曾接手書未及奉復新正又奉惠札殷殷懇懇在遠不遺真覺紙上情瀾不止三寸也惠到內閣撰擬文字皆國朝典制所關而大作鴻篇鉅製典麗商皇尤堪歷卷閣下著不朽之盛業作當代之傳人尤令人欽羨無已令兄宦况雖欠亨通然令姪接武芳蹤前程正未可量當亦吾兄所顧而色喜者也弟連歲於黃防城守竭盡心力賊氛之洶湧民心之渙散真有危乎殆哉之勢竟得瓦全已屬萬幸念事關桑梓自衛身家何敢言勞是以兩次聲明不邀獎敘乃中丞論功入

奏獎以道銜翎枝殊非始願所及來札復吉詞獎飾益令人汗愧矣

復陳壽卿京卿

廿餘年渴別忽奉手書如獲良覲爲之狂喜者累日就稔簠齋世仁兄年大人金石比壽翰墨娛情諸符頌臆竊意世間祿位名壽所在多有濃福尙易清福獨難吾兄竟兼而有之果何修而得此耶益令人健羨無已承惠篋拓六十四種不啻百朋之錫感銘奚似各種奇品皆前人著錄所未見聞者眞可謂集泉範之大觀惟就中有燕翁故物睹之不免人琴之感耳弟連歲

來襄理河工兼辦城防俗務不勝其煩自去歲稍得安謐現在除爲小兒課文外又編輯書畫鑑影彷彿退谷江村銷夏之例尙未竣事每思尊藏法書名畫甲於東省不得收入茲編爲憾且念當年文翰之交燕庭季雲子苾堯仙諸君均不少待惟餘吾兩人尙滯迹人間又復相望咫尺不獲聚首離索之感何如擬待秋間得暇鼓勇走訪作數日盤桓諒不我拒也敝藏古物無多茲倩子達精拓五十種寄奉清鑒業已傾筐倒篋仍慚撮土無增於泰華細流無益於江海耳

畚陳壽卿同年爲其令孫訂婚啓

卅年結契夙同李杜交情兩姓締姻更結朱陳合好恭惟壽卿
世大兄年大人門高海岱家聲欽鼎鼎之榮望重蓬瀛世德衍
箕裘之緒茁庭前之芝樹毓階下之蘭孫乃憑吉禮於良媒無
遺葑菲不鄙寒門之弱質許薦蘋蘩遂欣秦晉之訂盟頓忘鄭
齊之非偶譬蒹葭之依玉樹愧蘿蔓之附蒼松琴瑟和鳴惟冀
百年永好鳳凰諧卜豈徒五世其昌謹復蕪函伏希荃鑒

